

瑜伽師地論本地分菩薩地真實義品講義二十二(2013)

一、太虛大師註釋

雖則有情從無始來，心與法執相應，無先後生起之程序，但就行者之斷惑上，必先去貪、瞋、無明；次斷我執；再次斷法執。故論中不妨假說由依緣事而我見、我慢，由我見、我慢而貪、瞋、癡也。

二、有色無色法〔瑜伽卷65，經過整理〕

●有色法

云何有色諸法？謂若略說，有十色處，及法處所攝色〔十色處：五根與五塵。

勝義根、淨色根：能發識取境；扶塵根、扶根塵、浮塵根、浮根塵：根所依處。

法處所攝色：極略色、極迴色、受所引色、定果色、徧計所起色〕。由彼諸色具色自相，即以此事還說此事，是故說名有色諸法。

此有色法，由五種相差別建立。何等為五？

一、事故：此中諸所有色，彼一切若四大種、若四大種所造，應知是名略攝色事。除此更無若過若增。

二、自相故：諸色自相復有三種；

1、清淨色：謂四大種所造，五識所依五清淨色，眼等處攝，名清淨色。

2、清淨所取色：色等五境，同分清淨色之境界，名清淨所取色。若與識俱諸清淨色，與識同境，故名同分。若離於識諸清淨色，前後自類相續而轉，彼同分色。

3、意所取色：三摩地所行影像等色，名意所取色。

三、共相故：諸色共相亦有三種。

1、謂一切色，若據方處各別安立，若可宣說方處差別，名初共相。

2、又一切色，若清淨、若清淨所取增減相，當知是名第二共相。

3、又即此一切色，若觸所觸，即便變壞。或以手、足、塊、刀、杖等，或由寒熱、饑渴、蚊蟲、風日、蛇蝎諸觸所觸，即便變壞，當知是名第三

共相。

四、界故：若由定地色愛諸業之所生起，名色行色；若不定地色愛諸業之所生起，名欲行色。如是諸色，由界差別，略有二種。無色界中，無如是色。又前所說諸色共相，謂觸所觸，即便變壞。如是共相非一切遍。除欲界天遍餘一切。欲界天中所有諸色，但有手、足、塊、刀、杖等所觸變壞，無有寒熱、饑渴等觸之所變壞。由彼天中諸飲食等眾資生具，隨欲所生則便成辦，是故於彼雖有饑渴，不為損害。色界諸色，無有手、足、塊、刀、杖等所觸損壞，亦無餘觸之所損壞。

五、業故：若善、不善、無記身業語業，是名業色。當知是名色業差別。

●無色法

無色諸法，亦由五相差別建立；與此相違，應知其相。

三、有見無見法與有對無對法〔瑜伽卷65，經過整理〕

●有見無見等法：由五種相，建立有見諸法差別。何等為五？

一、顯色故：謂青黃赤白、光影明闇、雲煙塵霧及空一顯色。又顯色者：謂若色顯了，眼識所行。又顯色者：謂光明等差別。〔瑜伽卷1〕

二、形色故：謂長短、方圓、麤細、正不正、高下色。又形色者：謂若色積集長短等分別相。又形色者：謂長短等積集差別。〔瑜伽卷1〕

三、表色故：謂取捨屈伸、行住坐臥、如是等色。又表色者：謂即此積集色生滅相續，由變異因，於先生處，不復重生轉於異處。或無間、或有間、或近、或遠差別生。或即於此處變異生，是名表色。又表色者：謂業用為依轉動差別。〔瑜伽卷1〕

四、眼境界故：是眼所行〔所遊歷義〕，眼境界〔所矚取義〕。〔瑜伽卷1〕

五、眼識所緣故：眼識所行，眼識境界，眼識所緣〔帶行相所籌慮義〕。〔瑜伽卷1〕

亦由五相，建立無見諸法差別；與上相違，應知其相。

●有對無對法：由五種相，建立有對諸法差別。何等為五？

一、各據別處而安住故；二、於餘色聚容受、往來等業為障礙故；三、為手、足、塊、刀、杖等所觸，便變壞故；四、一切皆為諸清淨色之所取故；五、一切皆為依清淨色識所緣故。

亦由五相，建立無對諸法差別；與上相違，應知其相。

●廣無見對：即由五相，應知建立無見無對諸法差別。何等為五？

一、因緣故：謂具威德三摩地俱諸色勝解，當知是名無見無對色生因緣。

二、據處所故：彼既生已，處所可得，是故名色。

三、顯現故：雖不與彼十有色處自相相應，然得似彼自性顯現。於餘色聚容受、往來等業非障礙住，又非一切清淨之色及依彼識所取境界，亦非所緣，是故說名無見無對。

四、無變異故：手足等觸不能損壞，是故說名無有變異。

五、所緣故：又根本定，名具威德三摩地，此色是彼所緣，非餘。譬如非一切心皆能變化，若所有心具大威德方能成辦，非所餘心。此亦如是，要具威德極靜定心，方能為緣生此無見無對諸色。此如化色，亦非不具大威德心及不定心所緣境界，但是彼心所緣境界。

四、有漏無漏法〔瑜伽卷65，經過整理〕

●有漏：由五相故，建立有漏諸法差別。何等為五？

一、事故：謂清淨內色，及彼相依不相依外色，若諸染汙心心所，若善、無記心心所等。此有漏事，隨其所應，由餘四相說名有漏。謂隨眠故、相應故、所緣故、生起故。

二、隨眠相：若於清淨諸色，及於如前所說一切心心所中，煩惱種子未害未斷，說名隨眠，亦名麤重。若彼乃至未無餘斷，當知一切由隨眠故，說名有漏。

三、相應相：若諸染汙心心所，由相應故，說名有漏。

四、所緣相：若諸有事，若現量所行，若有漏所生增上所起，如是一切漏所緣

故，名為有漏。此中現在，名為有事；過去、未來，名非有事。若依清淨色識所行，名現量所行；若餘所行，當知名非現量所行。若內諸處增上生起一切外處，名有漏所生增上所起。唯彼所緣當知有漏。所以者何？若緣去來起諸煩惱，過去、未來非有事故，不由所緣說名有漏。若現在事非現量所行，如清淨色，及一切染汙、善、無記心心所，彼亦非煩惱所緣故，說名有漏。但由自分別所起相，起諸煩惱，非彼諸法為此分明所行境故。

五、生起相：

- 1、約諸法辨：由生起故成有漏者，謂諸隨眠未永斷故，順煩惱境現在前故，於彼現起不如理作意故。由此因緣，諸所有法正生、已生、或復當生，如是一切，由生起故，說名有漏。
- 2、約欲界繫辨：又從一切不善煩惱諸異熟果，及異熟果增上所引外事生起，如是一切，亦生起故，說名有漏。
- 3、約色無色繫辨：又由無記色無色繫一切煩惱，於彼續生；彼所續生，亦生起故，說名有漏。

如是名為由五相故，建立有漏諸法差別。

●無漏：由五相故，建立無漏諸法差別。何等為五？

一、有諸法離諸纏故說名無漏。謂一切善、無記心心所所依、所緣諸色，及善無記諸心心所。

二、有諸法隨眠斷故，說名無漏。謂已永斷見、修所斷一切煩惱，所有諸善及一分無記造色，若諸無記、若世間善諸心心所。

三、有諸法由斷滅故，說名無漏。謂一切染汙心心所，彼不轉故，說名無漏。由彼不轉，顯了涅槃，即此涅槃說名無漏。

四、有諸法是見所斷斷對治故，自性解脫故，說名無漏。謂一切見道。

五、有諸法是修所斷斷對治故，自性相續解脫故，說名無漏。謂出世間一切修道及無學道。

當知是名由五相故，建立無漏諸法差別。

五、有為無為法〔瑜伽卷65，經過整理〕

●有為：由五相故，建立有為諸法差別。何等為五？

一、後際未生故；二、前際已滅故；三、中際自相安住故；四、因緣相續故；五、果相續故。

〔問：何義，幾種，是有為？答：從因已生，正生，可生義故，一切是有為。顯揚5卷〕

〔問：何義，幾蘊，是有為？答：從因已生及應生義，一切是有為。瑜伽56卷〕

●無為：又由五相，建立無為諸法差別。何等為五？

謂與上相違，應知即是此中五相。滅有為法，證得涅槃。

●涅槃與有為

若謂涅槃為有異者，當知此為不如理問、不如理答、不如理思。如是若謂為無異者、有無異者、非有非無異者，當知皆是不如理問、不如理答、不如理思。

何以故？由彼涅槃，唯有為滅之所顯故，與有為法其相異故。

一、唯有為滅之所顯故；謂有異者，若問、若答、若思，便為戲論，非所戲論。

二、與有為法其相異故；謂無異者，如前廣說，便為戲論，非所戲論。

三、總如前說二種因故；亦異不異，不應道理。

四、由有為滅證涅槃故；若謂一切皆無所有，故說非有非無異者，不應道理。

涅槃義者，謂一切白法所顯發故。

涅槃相者，謂寂滅相、無戲論相，當知唯是內所證相。

●涅槃資糧有障無障〔瑜伽卷88〕

應知修集涅槃資糧，略有三障。

一者、依廣事業，財寶具足，多行放逸。

二者、無善知識，方便曉喻。

三者、未聞正法、未得正法，忽遇死緣，非時夭沒。

與此相違，當知無障亦有三種。

六、善不善無記法〔瑜伽卷65，經過整理〕

●善法

云何善法？

謂若略說，二因緣故，一切善法說名為善。謂自性無倒，亦能對治顛倒法故；及安隱故。所以者何？一切善法，自性無倒於所緣轉，又能對治於所緣轉顛倒染法；能往善趣，證涅槃故，名為安隱。

●不善

與此相違，二因緣故，當知不善。謂自性顛倒故，及不安隱故。

◎善法與不善法差別

一、善法：又由五相，當知建立善法差別。

- 1、感當來可愛果故。
- 2、對治雜染故；謂不淨等能治貪等，乃至八聖支道對治一切雜染諸法。
- 3、雜染寂滅所顯故；所謂涅槃。
- 4、清淨住所顯故；謂已離欲者，住聖等善現法樂住。
- 5、饒益有情所顯故；謂已離欲，為哀愍他，聲聞、菩薩及與如來所有種種利他善行。

二、不善法：又由五相，建立不善諸法差別；與上相違，應知其相。

- 1、謂感當來非愛果故，2、雜染對治之所治故，3、染不寂滅之所顯故，4、諸染惱住之所顯故，5、能損害他之所顯故。

◎善法與不善法彊盛

一、善法：由五因緣善法彊盛。何等為五？

- 1、由加行故：謂諸善法，無間加行、殷重加行之所造作；若無量品差別所作。謂或自作，或於是處勸他令作；以無量門慶慰讚美，見同法者深心歡喜。當知是名由加行故，善法彊盛。
- 2、由宿習故：又諸善法，曾餘生中若修、若習、若多修習，由是因緣，彼今生中性於善法心能趣入，於諸不善違背而住。當知是名由宿習故，善法彊盛。
- 3、由攝受勝功德故：又諸善法，下地所攝，由世間離欲者及見聖跡者，若

於解脫、或於無上正等菩提深心迴向，離諸見趣。當知是名攝受勝功德故，善法彊盛。

4、由田事處故：又諸善法，於大福田，以勝妙事施尊重處之所生起。當知是名田事處故，善法彊盛。

5、由自性故：又諸善法，若施所成，於戒、於修自性是劣。若戒所成，於施所成自性是勝，於修所成自性是劣。若修所成所有善法，於施、於戒自性皆勝。當知是名由自性故，善法彊盛。

二、不善法：與此相違，五因緣故，當知是名不善彊盛。

●無記

無記諸法性非顛倒，亦不能治顛倒諸法；性非安隱，非不安隱。

又由五相，建立無記諸法差別。何等為五？一、異熟生無記，二、威儀路無記，三、工巧處無記，四、變化無記，五、自性無記。此中自性無記，謂諸色根是長養者，及外諸有色處等，非異熟等所攝者。除善、染汙色處、聲處。

七、去來今法〔瑜伽卷66，經過整理〕

●過去法

云何過去法？謂因已受盡，自性已滅，無間為緣為生餘法，除阿羅漢最後心心所。熏習相續雖復已滅，經百千劫，猶能令彼愛非愛果異熟當熟。如所領受諸過去事，或一唯能生起憶念，或復有一不生憶念，唯滅所顯，無諸作用，是名過去諸法差別。

此過去法略由五相，當知建立其事差別。何等為五？

- 一、剎那過去：謂或有法剎那過去。謂於剎那一切行中，剎那已後所有諸行。
- 二、死沒過去：又或有法死沒過去。謂彼彼有情，從彼彼有情眾同分沒，廣說乃至死及後時。
- 三、壞劫過去：又或有法壞劫過去。謂器世間所攝，由火等災之所敗壞。
- 四、退失過去：又或有法退失過去。謂如有一，於先所得諸善功德安樂住中，隨類退失。
- 五、盡滅過去：又或有法盡滅過去。謂有餘依及無餘依涅槃界中所有盡滅。

●未來法

云何未來法？謂因未受、自性未受，待緣當生，將起現前，或近當生、或遠當生。

亦由五相建立差別。謂：一、剎那未來，二、一生未來，三、成劫未來，四、現行未來，五、最後未來。

●現在法

云何現在法？謂因已受用，自性受用未盡，剎那已後決定壞滅，一切雜染所顯一分清淨所顯。

亦由五相建立差別。謂：一、剎那現在，二、一生現在，三、成劫現在，四、現行現在，五、最後現在：謂阿羅漢最後心心所等。

八、我的異名〔瑜伽卷83〕

意生者：謂此是意種類性故。

摩納縛迦者：謂依止於意，或高或下故。

養育者：謂能增長後有業故；能作一切士夫用故。

補特伽羅者：謂能數數往取諸趣無厭足故。